

# L'Apuc vegn sut la marella

Dumonda Dosch davart las experientschas cun ella

■ **(anr/fa) L'Apuc ha remplazzà l'onn 2013 las autoritads tutelaras. Dapi quella giada ha il nov dretg federal per la protecziun d'uffants e creschids dà en Svizra bler da discurren.**

En Svizra datti 146 posts da l'Autoritad per la protecziun dad uffants e creschids (Apuc/Kesb) cun 715 collavuraturas e collavuratur. En Grischun datti tschintg da quels posts ch'han remplazzà a partir da Bumaun 2013 las autoritads tutelaras chantunals. Al cumenzament da quest onn ha il cussegl federal fatg bilantscha da la lavur e da las experientschas cun l'Apuc. «Il nov dretg, la nova autoritad nun haja laschè spetgar che tut funcziunia perfetgamain a partir da l'emprim di», ha cità il deputà *Filip Dosch* (pcd, Surses) or da quest rapport federal, «il cussegl federal conceda che l'Apuc integreschia en plirs lieus memia pauc ils conturns ils pli vischins da la persuna assistida.» Dosch e 42 collegas han dumandà la regenza grischuna tge experientschas ch'ins haja fatg en Grischun durant la perioda 2013 fin 2017 cun questa nov'organisaziun da la curatella. La finamira da quella era da professionalisar la lavur tutelara.

## Dumber da mesiras restà stabil en Grischun

La dumonda Dosch cuntogna set dumondas parzialas. Sco emprima è la dumonda co che las mesiras da la protecziun da creschids ed uffants s'haja sviluppada durant ils ultims tschintg onns. Il dumber da quellas mesiras saja restà stabil, per creschids en media 2000 mesiras e per uffants 700 mesiras l'onn. La regenza ha er infurmà ch'i na dettia nagina ten-

denza da spustar las mesiras da mandataris privats (30 pertschient) sin las curatellas profesionalas (70 pertschient). «Las Apuc èn cuntanschiblas da tut temp, ellas vegnan garantidas tras telefon mobil sur la centrala da la polizia chantunala resp. sur il numer 117». Ils custs per las mesiras importan tenor las indicaziuns da la regenza en media stgars 70 000 francs l'onn.

## 74 piazzaments en tschintg onns

Las Apuc hajan durant la perioda 2013–2017 disponì 74 piazzaments per motivs da provediment, ha orientà la regenza. Ils piazzaments disponids da medis na vegnan betg registrads da las Apuc. «Co giuditgescha la regenza la lavur da las Apuc, datti tensiuns tranter quellas e las vischnancas e datti secturs nua ch'igl exista in basegn d'agir?» era l'ultima part da las dumondas da Dosch e collegas. «La regenza giuditgescha la lavur da las Apuc en moda positiva ed interpretescha la quota da recurs ch'han success da mo circa in pertschient sco segn per l'acceptanza da las decisziuns da las Apuc.» Da tensiuns tranter quellas e vischnancas na sa la regenza nagut. I saja però inditgà da giuditgar suenter tschintg onns l'organisaziun da las Apuc sco talas e da guardar nua ch'igl existia potenzial d'optimaziun e far, sche necessari, las adattaziuns necessarias, ha concedì la regenza. Il departament da giustia, segirezza e sanadad lascha far actualmain questas examinaziuns da l'organisaziun da las Apuc grischunas. Dosch ha engrazià a la regenza per las infurmaziuns e ditg ch'el saja per gronda part cuntent cun las respostas.